



L'antieriu cusseglier guvernativ Klaus Huber e l'antieriura cussegliera guvernativa Barbara Janom Steiner.



Cusseglier nazional e pur Duri Campell (san.) cun cusseglier guvernativ Jon Domenic Parolini.

FOTOS G. N. STGIER



Beno Niggli, il president da la pbd grischuna, Brigitta M. Gadiant, l'antieriura cussegliera nazionala, e Gian Michael, il schef da fracziun da la pbd (da san.).



Er stads a la festa èn Hansjörg Trachsel, l'antieriu cusseglier guvernativ (san.) e Gieri Luzi, l'antieriu president dal cussegl grand.



Qua Hansjörg Hassler, l'antieriu cusseglier nazional (san.) e Hansjörg Gredig.



Adolf Collenberg, el ha tegnì il referat da festa.

## «Strusch stads ventiraivels cun la pps»

Landquart: 100 onns democrats grischuns

DA GION NUTEGN STGIER/ANR

■ **En lur istorgia da 100 onns han ils democrats da noss chantun fatg trais epocas istoricas. Dals liberals tar ils democrats, vinavant tar la pps e lura tar la pbd.** La politica dovra er oz il patratgar democratic, ha ditg *Eveline Widmer-Schlumpf*, l'antieriura cussegliera federala. Tut auter che tradiziunal cun inni svizzer e bandieras, mabain cun musica da rock e pop ha la Partida burgais-democratica grischuna (pbd) festiva il giubileum da 100 onns dapi la fundaziun da la Partida democratica. In grond dumber commembers e commembras da la pbd ha fatg venderi saira il viadi a Landquart per assister a l'occurrèza giubilara.

### Ina partida dal center

*Beno Niggli*, il president da la pbd chantunala ha ditg en ses pled da bainvegni che la pbd saja clermain ina partida dal center. Ella saja ina ferma pitga tranter l'ala dretga e l'ala sanestra. Noss pajais dovra urgentamain ina partida che fetschia politica reala, che saja seriosa, credibla e manavla al pievel. Tuts quels aspects dastga el attribuir a la pbd, ha punctuà Niggli. Il chapital da la pbd sa-

ja cler, la basa da la partida, ditg pli concret, ils commembers fidaivels e las commembras fidaivlas. La pbd haja er betg da basegn da sa far sentir cun in'acziun cun in mail che daventa marsch pervia dals verms d'autras partidas. Niggli ha ditg che quella acziun da la pps cunter las autras partidas saja ina vaira impertinèza. Cun ina partida che haja fatg quai, sco la pps da preschent, veglia la pbd da far nagut e segir betg ina colliaziun da glistas.

### Per ina politica burgaisa e liberala

Er suenter ch'ils democrats grischuns sajan daventads il 1971 commembers da la pps, saja il clima tranter ils democrats grischuns e quels da Turitg e Berna savens stà differenzià, ha menziuna *Widmer-Schlumpf*, ella ch'è stada otg onns commembra dal cussegl federal. Er en l'avègnir vegnia la pbd a cumbatter per mantegnair en la politica il pensar democrat. Per far politica dastga na mancar il respect, la raschun, il curasch e la prudientscha. La pbd s'engascha cunzunt er per ina politica burgaisa e liberala, ha ditg la dunna da Favugn. Bunas cundiziuns da basa, ina politica d'energia reala, in engaschament per l'energia hidraulica, per ina segirezza da las organisaziuns socialas e per ina via bilaterala cun l'Europa, per

tut quels aspects stettia la pbd garant, ha menziunà l'antieriura cussegliera federala.

### Clermain la pbd

Oratur da la festa da giubileum 100 onns democrats grischuns è stà l'istoricher *Adolf Collenberg*. Cun in referat interessant, infurmativ ed en in fitg bun lungatg ha il Sursilvan dà in sguard en l'istorgia da 100 onns dals democrats da noss chantun. Il 1919 saja vegnida fundada la Partida democratica, e quai cun sa distanztar ils democrats dals liberals. Cun vegnir or da la «BGB» (Bauern-, Gewerbe- und Bürgerpartei) il 1971 la pps saja cunzunt cumenzà l'era «Schlumpf» e «Gadiant» tar la pps grischuna. Leon Schlumpf ed Ulrich Gadiant defuncts, omadus hajan mess accents sin champ chantunal e federal cun lur politica, ha ditg Collenberg. El ha er ditg ch'ils democrats grischuns sajan però strusch stads propi ventiraivels en la retscha da la pps. Quai che saja lura succedi il 2007 saja enconuscent a mintgin, la separaziun da la pps grischuna da la pps svizra e la fundaziun da la pbd. Quella partida, la pbd saja gist quella che tgiria il pli fitg il pensar democratic, ha menziunà l'istoricher sursilvan.



Trais dunnas da la pbd. (da san.) Eveline Widmer-Schlumpf, Edith Gugelmann-Battaglia e Susanne von Rechenberg.